

Aldiënza dla defensuria popolara en vëndres, 7 de merz, dales 14.00 - 17.00, a San Martin tl salf di stödafüch. Prenotaziun por telefon 0471 946 020.

PLOANIES SAN MARTIN Y LUNGIARÜ

De mondial dl'oraziun dles ères "Te m'as formé tan demorvèia!"

La Uniun dles Ères presentèia i proiec de aiüt ales ères

a San Martin, en sabeda, ai 8 de merz, dales 18.30 tratan mëssa y

a Lungiarü, en domènia, ai 9 de merz, dales 8.15 tratan la liturgia dla parora.

L'oferta che vëgn ite vëgn menada inant por sostigni deplü proiec sciöche "formaziun y educaziun ala pesc pro ères y jonèza" y "renforzamënt dles ères indigenes" tla Palestina y tla Indonesia. Düc é dër bel invia.

SAN MARTIN

Invit ai Seniors y les Seniores da San Martin y Antermèia da gní a tó pert al iade por sanc dl pröm vëndres de merz a Spinges, en vëndres ai 07 de merz. I s'abinun dales 8.30 sön plaza dl paisc da San Martin, por jí ia deboriada cun i auti privac. Dales 10.00 sarál mëssa ia Spinges cun don Marco y dedò junse a marèna tl hotel Roger. Le cost é de 20 euro porom. Incö domènia, ai 02 de merz, él l'ultimo de da se prenoté pro Leo 348 40 96 351. Gnide tröc!

Le Grup Jonil di Stödafüch da San Martin mët tosc indô man cun süa ativité. Düc i mituns da 12 agn insö o che i complësc en chësc ann y ess interes da tó pert pó s'anunzié pro Dennis 346 95 70 357.

Le Museum Ladin invièia a n laboratore creatif sön les munts dles Dolomites en vëndres, ai 14 de merz, dales 16.00 ales 17.30, tl MusLa Ursus ladinicus a San Ciascian. I descoriun adöm le monn dles munts: Tla forma de jüch y te na manira artistica cun papier scarzé y corusc cheriunse n paesaje da munts propi bel. N'esperiënza che lièia creativité, mister y divertimënt. Le laboratore é por mituns y mitans da 4 a 8 agn. Le cost de partezipaziun é de 5 euro. Al pó tó pert 15 mitans/uns por laboratore. I periun da se prenoté por mail a prenotaziuns@museumladin.it o por telefon a 0474 524020.

Les iscriziuns ales Scores de musiga dla Provinzia vëgn fates "online" dal 01 de merz cina ai 31 de merz 2025 tres le sorvisc dl'aministraziun provinziála "myCivis" <https://civis.bz.it/einschreibung-musikschule>. L'azes al sorvisc online vá tres SPID o CIE (cherta d'identité eletrónica). Informaziuns plü avisa tl secretariat dla Scora de Musiga a La Ila: Tel. 0471/847748 o sot a <https://deutsche-bildung.provinz.bz.it/de/musikschulen>.



unitepastorala.org

Plata dles Ploanies San Martin y Lungiarü

ploan siur Klaus Sottsas 344 15 54 055 - klsottsas@rolmail.net
redaziun: anton.gasser@rolmail.net - 348 27 44 517 / 0474 523194

02.03. - 09.03.25 n. 14

termo por comunicaziuns: jöbia, dales 20.00

8ª Domènia ia por l'ann C

Vangele do san Lüca 6, 39-45

Te chël tëmpti ti à Gejú dit a sü discepui: Sciafia pa n verc da menè n verc? Ne tomarài mo nia trami te na büja? Le scolar n'è nia sura so maester; vignun che à imparè döt cant sarà mà sciöche so maester. Ciodî vëigheste pa l'agüz tl edl de to fre, mo dla trè te to edl ne t'un intèneste nia? Cò sciàfieste pa da ti dî a to fre: Fre, làsceme trà l'agüz fora de to edl!, deperpo che instès ne vëigheste nia la trè te to edl? Tò falzun! Tira naôta la trè fora de to edl; spo poste porvè da trà fora l'agüz fora dl edl de to fre. Al n'è nia de bugn lëgn che porta de stlec früc, no de stlec lëgn che porta de bugn früc. Vigni lëgn conëscion a sü früc; dai ardiuns ne cöion degügn fighi, y dala trognora da spinac ne cöion degöna üa. N bun chestian porta de bun a löm, deache te so cör él de bun; n ri chestian porta de ri a löm, deache te so cör él de ri. De cí che le cör é plëgn, de chël cunta la bočia.



*Incö él Gejú che nes porta dant na sfilza de confrunc:
Verc che toma te na büja. Tres y agüc ti edli. Lëgn y sü früc.
Gejú ne pordica chiló nia da lassö jö. Al ne baia nia te na manira astrata.
Gejú ti deura le cör ala jënt. Al cunta fora de süa vita.
Insciö se vëiga la jënt instëssa tles stories che Gejú ti cunta
y ara se deura de süa buna a Chël Bel Dî.
Deache, che ó pa ince ester verc? Che ó pa vire cun na tre tl edl?
Che ó pa porté de stlec früc? -
Ara ne stá nia a me, mo a Chël Bel Dî y a süa misericordia da iudiché sura me
y ince da iudiché sura i atri, porchël ne n'oi nia m'astilé da iudicadú. Image*

EDEMA - C	SAN MARTIN	LUNGIARÜ
02.03.25 8^a Domènia ia por l'ann C	9.30 Corona por vocaziuns (<i>don Marco</i>) 10.00 Gran Mëssa por la comunité + Teresa Pedevilla Flöss, dl ann de rengr. y en onur de Sant Antone a d'intenziun	7.50 Corona (<i>don Marco</i>) 8.15 Gran Mëssa por la comunité dl ann + Serafin Clara dl ann + Johanna Schanung dl ann + Guido Clara + Albert Daverda + Serafin Canins
03.03.25 <i>Cunigunda, Tobia</i> Lönesc		
04.03.25 Dedolönesc - Carlascé <i>Casimir, Teofil</i>	8.00 Mëssa benefaturs y jënt dla Ciasa de Palsa + Carlo Dejaco	
05.03.25 <i>Oliva, Dietmar</i> CAPIUN - Mercui	9.00 Mëssa y imposiziun dl cënder en onú dl Spirit Sant	7.30 Mëssa y imposiziun dl cënder ++ Ti y Sisto Clara ++ dl Caizer + Zita Mischi Dapoz
06.03.25 <i>Fridolin, Coleta</i> Jöbia		
07.03.25 Pröm vëndres <i>Perpetua y Felizita</i>	18.30 Adoraziun chîta 19.00 Les Staziuns	16.30 Les Staziuns cun scolars y families
08.03.25 Sabeda <i>Jan de Dî, Michael</i>	18.30 Mëssa prefestia (<i>siur Klaus</i>) De mondial de oraziun dles ères cun oferta families de Herta y Ludwig Rungger + Augustin Clement	
09.03.25 1^a Domènia de Carsëma C Domènia dla Dlijia te ciasa	9.30 Corona (<i>siur Klaus</i>) 10.00 Gran Mëssa por la comunité Presentaziun di mituns y dles mitans che vá ala Pröma Comuniun por les families + Tone Unterweger, dl ann + Loise Ploner Unterweger	7.50 Les Staziuns ciantades dal Cor 8.15 Zelebrazion dla Parora de Dî De mondial de oraziun dles ères cun oferta



Oraziun do l'intenziun dl Papa por le mëis de merz

I periun che le families rotes indalater pois
ciafé, tres le pordonn, la varijun de sües plaies
y odèi indô danü ince te sües desfarënzies la
richëza dles cualités di atri.

Döt le bun
a chi che complësc
i agn de merz



a San Martin

Heinrich Castlunger che nen complësc 81 ai 4
Zita Penazzi Tavella che nen complësc 81 ai 14

a Lungiarü

Maria Verginer Clara che nen complësc 82 ai 13

Carlascé



Al s'incunta dui üs:
"Ciodí este pa tan da polan?"
"Ne capësceste nia ch'i sun n kiwi?"

Pro gosté:
"Ciodí aste pa lasce tomé le joghurt ia por tera?"
"Al é bele tomé!"

Döes eschimo é jüdes a se bëre n café.
Canch'ares röia a ciasa damana öna l'atra:
"Olá é pa to iglu?" - "Ne m'ai pa indô desmentí
da destaché le fer da sferié fora."

Dui leri dan na vidrina de na botëga de belijia.
"Tan arateste pa che chë variëta da diamanc
costa?" "O bëgn almanco dui agn de porjun."